



**Ministerie van Algemene Zaken en Buitenlandse Betrekkingen
Secretariaat Raad van Ministers - Afdeling Voorlichting (voorheen RVD)**

K O M U N I K A D O D I P R E N S A

Después ku aña pasá oktober algun ex-trahadó di Curaçao Drydock Maatschappij N.V. (CDM) a kuminsa un kaso na Miami kontra di e empresa alegando ku nan a wordu forsá pa traha na e kompania bou di sirkunstanshana inhumano, Gobiernu di Antias a aktua mes ora i den konsulta ku Ministerio di Asuntunan Eksterior na Ulanda a stop temporalmente e otorgamentu di visa pa Cubanonan. Na mes momentu Minister di Asuntunan Ekonómiko i di Labor a instituí un komishon pa investigá e situashon di trahadónan Cubano na Dok. E komishon tabata konsistí di representantenan di Departamentu di Asuntunan Ekonómiko, di Departamentu di Labor i di Direktorado di Relashonnan Eksterior. Tambe e komishon a haña e enkargo pa averiguá si e areglo a base di kual e trahadónan Cubano ta bin traha na Dok ta en pugna ku tratadonan internashonal.

Den su rapport definitivo e komishon a konsehá Gobiernu pa mas pronto posibel terminá e areglo eksistente pa empleo di e Cubanonan na Dok. Siguiyemente Dok i outoridatnan Cubano a yega na un areglo nobo, den kual a wordu stipulá ku e Cubanonan lo ehersé labor na Dok conforme e stipulashonnan di leyman laboral Antiyano.

Ultimamente un organisashon no-gubernamental prosedente di Ulanda, Fundashon Cuba Futuro, kende algun tempu pasá ya kaba a bai den publisidat ku e asuntu di e trahadónan Cubano na Dok, a kuminsa vosiferá e opinion ku e areglo nobo tambe ta violá tratadonan internashonal di derecho humano. Den nos komunidat tambe na diferente okashon a lanta kritika riba e situashon di e Cubanonan na Dok.

Pa segurá ku berdaderamente ta kumpli ku e areglo nobo i ku ningun tratado internashonal di derecho humano ta wordu violá, resientemente Gobiernu Sentral a bolbe duna e enkargo pa laga investigá e situashon di trahadónan estranhero -i speshalmente esnan prosedente di Cuba- na Dok. Gobiernu Sentral a informá Gobiernu Insular di Korsou por eskrito di e desishon aki. Entretantu e investigashon ya kaba ta tumando lugá i aktualmente Gobiernu Sentral ta pendiente di e resultadonan. Ta importante pa nos realisá ku un tipo di investigashon asina ta difisil, wetando e echo ku e Cubanonan ta prosedente di un sistema, kaminda transparensa no ta usual.

Wetando tambe ku dos miembro di Parlamento Ulandés ya kaba a hasi preguntanan riba e situashon na Dok, Gobiernu di Antias awe mainta den konsulta ku Ministerio di

Asuntunan di Eksterior na Ulanda a disidi, di por lo tantu stop temporalmente e otorgamentu di visa pa Cubanonan ku mester bin traha na Dok. E medida aki lo keda na vigor te na e momentu ku e resultado di e di dos investigashon bira konosí.

Ta obvio ku dado kaso ku resultá ku e tratamentu di e Cubanonan ahinda no ta sosodé segun nos leynan laboral i/o tin violashon di tratadonan internashonal di derechonan humano ta tuma lugá, ku Gobiernu Sentral lo tuma su responsabilidadat den e kaso aki.

Willemstad, 27 di mart 2007